



ԱՌԱՋՆՈՐԴԱՐԱՆ ՀԱՅՈՑ
ՀԻՄՆԻՍԱՅԻՆ ԱՄԵՐԻԿԱՅԻ ԱՐԵՄՏԵԱՆ ԹԵՄԻ
WESTERN PRELACY
OF THE ARMENIAN APOSTOLIC CHURCH OF AMERICA
 Archbishop Moushegh Mardirossian, Prelate
 Tel: 818-248-7737/8, Fax: 818-248-7745, E-mail: Prelacy@aol.com



ԳՈԼՈՐԱՏՈՅԻ ՀԱՄԱՅՆՔԻ ԱՅՅԵԼՈՒԹԵԱՆ ԱՌԹԻ

«ԹՈՂ ԱՅՍ Ս. ՊԱՏԱՐԱԳՈՎ ՀԱՂՈՐԴՈՒԻՆՔ ՕՐՈՒԱՆ ՊԱՏԳԱՄՈՎ ԵՒ ՊԱՅԾԱՌԱԿԵՐՊՈՒԻՆՔ ՀՈԳԵԳԱԼՍՏԵԱՆ ԽՈՐՀՈՒՐԴՈՎ»

Պատգամեց Առաջնորդ Սրբազան Հայրը

Թեմիս բարեջան Առաջնորդ Բարձրաշնորհ Ս. Սուշեղ Արք. Մարտիրոսեան ընկերակցութեամբ Կրօնական Ժողովի ատենապետ՝ գերպ. Տ. Միւռն Տ. Կրդ. Ազնիկեանի Ուրբաթ, 2 Յունիս 2006-ին, հոգեւոր առաքելութեամբ մեկնեցաւ Գոլորատոյի մեր ծխական հայ համայնքը եւ հանդիպումներ ունեցաւ նորընտիր հոգաբարձական կազմին եւ Գոլորատո հաստատուած մեր ծուխի ընտանիքներու հետ: Սրբազան Հայրը իր բոլոր հանդիպումներու ընթացքին կարեւորութեամբ անդրադարձաւ սփիւռքեան եւ օտար պայմաններու ներքեւ ապրող մեր ժողովուրդի կեանքէն ներս հայ եկեղեցւոյ կարեւոր դերակատարութեան, անոր հոգեւոր եւ ազգային առաքելութեան, միաժամանակ կոչ ուղղելով համայնքային կեանքէ ներս առաւել պատասխանատուութեամբ, լրջութեամբ եւ գիտակից յանձնառութեամբ դրական եւ շինիչ աշխատանք ծաւալելու եւ եկեղեցւոյ նիւթեղէն ու քարաշէն կառոյցէն առաջ ու վեր՝ ճշմարիտ հոգեւոր եկեղեցի ըլլալու անհրաժեշտութեան եւ այս յանուն քրիստոնեայ հայ ընտանիքի առողջ գոյատեւման, նոր սերունդի քրիստոնեական եւ հայեցի արժեքներով դաստիարակելու նախանձախնդրութենէ թելադրուած:

Կիրակի, 4 Յունիսի յետ միջօրէ ժամը 1:30-ին, Առաջնորդ Սրբազանը առընթերակայութեամբ Հայր Սուրբին, Ս. Կապրիէլ Անկլիքան եկեղեցւոյ մէջ քրիստոնեական եկեղեցւոյ կարեւորագոյն տօներէն՝ Ս. Հոգւոյ Գալստեան հրաշալի դէպքին առթիւ Ս. եւ անմահ պատարագ մատուցանեց եւ իր հոգեշունչ պատգամով անդրադարձաւ.

ա.- Մեր Տիրոջ Յիսուս Զրիստոսի հրաշափառ յարութենէն ետք Անոր քառասնօրեայ երկրաւոր կեանքին, առաքեալներուն եւ աշակերտներուն երեւումներուն, հրաշալի դէպքերուն, վերջին խրատներուն, Ս. Հոգւոյ առաքման խոստումին եւ հուսկ՝ երկինք Համբարձման հրաշապատում դրուագներուն:

բ.- Համբարձումէն տասը օր ետք, Պենտեկոստի կամ Հոգեգալստեան դէպքը Վերնատան մէջ միասիրտ եւ միախորհուրդ աղօթող եւ Ս. Հոգւոյ Գալուստը անձկութեամբ սպասող առաքեալներ, ստանալէ ետք Աստուծոյ Ս. Հոգիին զօրութիւնը, որ կրակէ լեզուներու կերպարանքով իրենց վրայ հանգչեցաւ՝ սկիզբը կը դրուէր քրիստոնեական եկեղեցւոյ հաստատման: Զրիստոնեական եկեղեցւոյ ծննդեան այս տարեդարձը եւ թուականը պէ՛տք է ըլլայ նաեւ Գոլորատոյի Հայց.

Առաքելական Եկեղեցւոյ եւ հայ համայնքին հոգեւոր տարեդարձը, ըսաւ Սրբազանը, որովհետեւ, այնպէս՝ ինչպէս Աստուծոյ Սուրբ Հոգիին գալուստը հրաշակերպեց, կերպարանափոխեց, իմաստութեամբ, գորութեամբ եւ շնորհքներով զարդարեց առաքեալներն ու Վերնատան մէջ հաւաքուած աշակերտներն ու հաւատացեալները, որոնք այնուհետեւ Աւետարանի քարոզութեան եւ վկայութեան առաքուեցան, նոյնպէս ալ Աստուծոյ Ս. Հոգւոյ պարգեւ շնորհքը, հաւատքը, սէրը, քաղցրութեան հոգին, հանդուրժողութիւնը, համագործակցական բարի հոգին գտող, բիրեղացնող ներգոր ազդակները պէտք է ըլլան Գոլորատոյի Հայց. Առաքելական Եկեղեցւոյ ու համայնքի կեանքէն ներս:

Առաջնորդ Սրբազան Հայրը վկայակոչեց եւ անդրադարձաւ Հոգեգալստեան դէպքին յաջորդող առաքեալներու պատմական գործունեութեան՝ երբ անոնք աշխարհի չորս անկիւնները գացին եւ բոլոր ազգերուն Քրիստոսի փրկարար Աւետարանը քարոզեցին. ան յիշեցուց, որ Քրիստոսի առաքեալներէն՝ Ս. Թադէոսն ու Ս. Բարթողիմէոսը Աւետարանին Բարի Լուրը եւ Լոյսը բերին Հայաստան աշխարհ եւ լուսաւորեցին հայ ժողովուրդը, որ աշխարհի ազգերու եւ ժողովուրդներու մէջ եղաւ առաջինը քրիստոնէական կրօնը հռչակելու ազգային պետական կրօն: Դուք ալ, սիրելիք, ըսաւ Սրբազանը, առաքեալներու եւ մեր հայրերու հաւատքով, նախանձախնդիր ոգիով, մօտիկ ապագային անպայման պէտք է ունենաք ձեր հաւատքի եւ աղօթքի սեփական տուն-եկեղեցին՝ ծուխի հաւատացեալ զաւակները հոգեւոր եւ ազգային անքակտելի կապերով իրարու զօդելու, համայնքային աշխուժ կեանք ստեղծելու, քրիստոնէական հաւատքով մկրտելու եւ հայու Ս. Միւռնոսով օծելու ձեր սիրասուն զաւակները, նարօտ եւ պսակ օրհնելու, հոգեւոր սնունդ մատակարարելու, առաջնորդութիւն եւ մխիթարութիւն բերելու բոլորին:

գ.- Սրբազանը կոչ ուղղեց բոլորին, որ Աստուծոյ ընծեռած պարգեւներէն՝ իւրաքանչիւրը իր կարողութեան համաձայն,՝ եւ ունեցած շնորհքներէն ու բարիքներէն Աստուծոյ եւ հասարակաց բարիքին ընծայաբերէ, տրամադրելով՝ ժամանակ, բարոյական թէ նիւթական միջոցներ: Ապա, երգուեցաւ հոգեգալստեան շարականներէն՝ «Սարսափելի հողմոյ նման» երգը եւ Սրբազան Հայրը յատուկ աղօթքով օրհնեց համայնքի մանուկներն ու երեխաները, եկեղեցւոյ վաղուան ժառանգորդները:

Պատարագի ավարտին, եկեղեցւոյ սրահին մէջ սիրոյ սեղանի ընթացքին, Առաջնորդ Սրբազանը Տիկ. Աննա Գաւաթեանին շնորհեց օրհնութեան եւ գնահատանքի յատուկ գիր, համայնքի կեանքէն ներս երկար տարիներ որպէս երգեհոնահար, եկեղեցւոյ մէջ ծառայութեան առ ի գնահատանք: Սրբազան Հայրը այս առթիւ նաեւ ներկաներուն յանձնեց յատուկ յուշանուէրներ:

Մ.Ծ.Վ.Ա.

DURING A VISIT TO THE COLORADO PARISH COMMUNITY

“WITH THIS HOLY MASS, LET US BE FILLED WITH THE MESSAGE OF THE FEAST, AND ENLIGHTENED BY THE MYSTERY OF PENTECOST”

Declared the Prelate

From June 2-4, 2006, His Eminence Archbishop Moushegh Mardirossian, Prelate, joined by Very Rev. Fr. Muron Aznikian, Chair of the Prelacy Religious Council, visited the parish of the Armenian Apostolic Church of Colorado and Rocky Mountain Region, to meet with the newly elected parish council and the parish community.

On the afternoon of Sunday, June 4, the Prelate, assisted by Very Rev. Fr. Muron, conducted Holy Mass and delivered his sermon on the occasion of the Feast of Pentecost, highlighting three main points.

He spoke of the appearances of Christ to the disciples in the forty days after His Glorious Resurrection and His ascension to Heaven. The Prelate also spoke of how ten days after the Ascension, the disciples were gathered at the Upper Room waiting for the Comforter, the Holy Spirit, which descended and rested on each one of them. That day became the birthday of the Christian Church, noted the Prelate, and added that it should also be the spiritual anniversary of the Armenian Apostolic Church of Colorado and the Armenian community. He continued, just as the disciples of our Lord spread the Gospel to the four corners of the world, especially Saints Thaddeus and Bartholomew who spread the Gospel to the Armenian people, you too must follow their example and establish a church in the near future to bind the community to the Armenian Apostolic faith, and offer spiritual nourishment to the faithful. Archbishop Mardirossian requested from those present that to the best of their abilities, each and every one of them must assist in the church by donating their time, or by offering moral or financial support. Subsequently, hymns for Pentecost were sung and the Prelate offered a special prayer for the youth, who are the future of the church.

Following Mass a reception was held at the church hall, where the Prelate presented Mrs. Anna Kavafian with a letter of blessing and commendation for her longtime service to the Armenian Church as an organist. On this occasion, the Prelate also presented those in attendance with mementos.